

PSYCHE
FABULA APULEII.

QUAM

VENIA AMPL. FACULT. PHILOS. ABOENSIS

P. P.

JOH. GABR. LINSÉN

Phil. Mag. Litterat. Rom. Adjunctus,

&

GUSTAVUS WILH. RIDDELIN

Nylandi,

P. V.

In Audit. Philos. die XVI Novembr. MDCCXXII.

h. a. m. s.

ABOÆ, excudebant J. C. Frenckell & Fil.

5.

Thesium Continuatio.

XIX.

Vis atque ratio poëseos dramaticæ in eo continetur, quod pugnam libertatis cum necessitate, harumque inde demum oriundam conciliationem oculis spectantium subjiciat.

XX.

Nec itaque fieri potest, ut tristi semper sit exitu tragœdia, sed aliquando etiam hiliori.

XXI.

Quod inter Romanos parum adeo tragicæ floruit Musa, id in primis ex ipso gentis ingenio repetendum est. Nam totius orbis victores fato destinatos semet fингentibus — ita supra humanam sortem evectos — animus superbis vix quidquam percipere potuit delectationis ex fabula vere tragicæ.

XXII.

Qui certaminibus gladiatoriis, vehementer sane populo Romano adamatis, illud adtribuunt, effectum ii pro caussa habent,

utique, quanto iam tempore delitescentem ancillam ne-
quiverim reperire. Nil ergo superest, quam tuo præ-
conio præmium investigationis publicitus edicere. Fac
ergo mandatum matures meum, & indicia, quibus pos-
sit cognosci, manifeste designes, ne, si quis occultationis
illicitæ crimen subierit, ignorantiae se possit ex-
cusatione defendere. Et simul dicens libell'um ei por-
rigit, ubi **Psyches** nomen continebatur & cetera. Quo
facto protinus domum secessit.

Nec Mercurius omisit obsequium. Nam per omnium
ora populorum passim discurrens, sic mandatæ prædi-
cationis munus exsequebatur:

Si quis a fuga retrahere, vel occultam
demonstrare poterit fugitivam regis fi-
liam, Veneris ancillam, nomine **Psychem**,
conveniat retro metas Murtias Mercu-
rium prædicatorem, accepturus indicinæ
nomine ab ipsa Venere septem savia sva-
via, & unum blandientis adpulsu linguae
longe mellitum.

Ad hunc modum pronuntiante Mercurio, tanti
præmii cupido certatim omnium mortalium studium
arrexiserat. Quæ res nunc vel maxime sustulit **Psyches**
omnem contationem.

Jamque fores ejus dominæ proximanti occurrit una
de famulatione Veneris, nomine **Consuetudo**: statimque

quantum maxime potuit exclamat: Tandem, ancilla nequissima, dominam habere te scire cœpisti? An pro cetera morum tuorum temeritate istud quoque nescire te fingis, quantos labores circa tuas inquisitiones sustinuerimus? Sed bene, quod meas potissimum manus incidisti, & inter Orci cancros jam ipsos adhæsisti, datura scilicet aëtatum contumaciæ tantæ poenas. Et audaciter in capillos ejus immissa manu, trahebat eam, nequaquam renitentem. Quam ubi primum inductam oblatamque sibi conspexit Venus, latissimum cachinnum extollit, & qualem solent furenter irati; caputque quatiens, & adscalpens aurem dexteram: Tandem, inquit, dignata es socrum tuam salutare? An potius maritum, qui vulnere tuo periclitatur, intervicare venisti? Sed esto secura: jam enim excipiam te, ut bonam nurum condecet, &: Ubi sunt, inquit, Sollicitudo atque Tristities, ancillæ meæ? Quibus introvocatis torquendam tradidit eam. At illæ sequentes herile præceptum Psychem misellam, flagellis afflictam & ceteris tormentis excruciatam, iterum dominæ conspectui reddunt.

Tunc rursus sublato risu Venus: Et ecce, inquit, nobis turgidi ventris sui lenocinio commovet miseracionem, unde me præclara sobole aviam beatam scilicet faciat. Felix vero ego, quæ in ipso ætatis meæ flore vocabor avia, & vilis ancillæ filius nepos Veneris audit. Quamquam inepta ego frustra filium dicam. Impares enim nuptiæ, & præterea in villa sine testibus & patre non consentiente factæ, legitimæ non possunt

videri: ac per hoc spurius ille nascetur; si tamen partum omnino proferre te patiemur. His editis, involat in eam, vestemque plurifariam diloricat, capilloque discisso, & capite conquassato, graviter afflit. Et, accepto frumento & hordeo, & milio, & papavere, & cicere, & lente, & faba, commixtisque acervatim confusisque in unum grumulum, sic ad illam: Videris enim mihi tam deformis ancilla, nullo alio, sed tantum sedulo ministerio amatores tuos promerer. Jam ego & ipsa frugem tuam periclitabor. Discerne seminum istorum passivam congeriem: singulisque granis rite dispositis atque sejugatis, ante ipsam vesperam opus expeditum approbato mihi. Sic assignato tantorum seminum cumulo, ipsa cœnæ nuptiali concessit.

Nec Psyche minus admolitur inconditæ illi & inextricabili moli; sed immanitate præcepti consternata, silens obstupescit. Tunc formicula illa parvula atque ruricola, certatim difficultatis tantæ laborisque miserta contubernalis magni dei, socrusque sævitiam exsecrata, discurrens gnawiter convocat corrogatque cunctam formicarum accoliarum classem. Miseremini, terræ omnipotentis agiles alumnæ, miseremini: & Amoris uxori, puellæ lepidæ, periclitanti promta velocitate succurrite!

Ruunt aliæ superque aliæ sepedum populorum undæ, summoque studio granatim singulæ totum digerunt acervum: separatimque distributis dissitisque generibus, e conspectu perniciter abeunt. Sed initio noctis e convivio nuptiali vino madens & fragrans bal-

sama Venus remeat, totumque revincta corpus rosis
micantibus, visaque diligentia miri laboris: Non tuum,
inquit, nequissima, nec tuarum manuum istud opus.
sed illius, cui tuo, immo & ipsius malo, placuisti. Et
frusto cibarii panis ei projecto, cubitum facessit.

Interim Cupido solis interioris domus unici cubi-
culi custodia clausus, coercebatur acriter: partim, ne
petulanti luxurie vulnus gravaret, partim, ne cum sua
cupita conveniret. Sic ergo distinctis, & sub uno tecto
separatis amatoribus, tetra nox exantlata. Sed aurora
commodum inequitante, vocatæ Psychæ Venus infit
talia: Videsne illud nemus, quod fluvio præterfluenti,
rupique longæ attenditur: eujus imi gurgites vicinum
fontem despiciunt? Oves ibi nitentes, aurique colore
florentes, incustodito pastu vagantur. Inde de coma
preciosi velleris floccum mihi confestim quoquomodo
quæsitum afferas censeo. Perrexit Psyche volenter,
non obsequium quidem illa functura, sed requiem ma-
lorum præcipitio fluvialis rupis habitura. Sed inde de
fluvio musicæ svavis nutricula, leni crepitu dulcis
auræ divinitus inspirata, sic vaticinatur Arundo viri-
dis: Psyche, tantis ærumnis exercita, neque tua miser-
rima morte meas sanctas aquas polluas, nec vero con-
tra formidabiles oves istius oræ feras aditum; quoad de
solis flagrantia mutuato calore, truei rabie solent effe-
rari, cornuque acuto, & fronte saxea, & non numquam
venenatis morsibus in exitium sævire mortalium. Sed
dum meridies solis sedaverit vaporem, & pecua spiritus
fluvialis serenitate conquieverint, poteris sub illa pro-

cerissima platano, quæ mecum simul unum fluentum babit, latenter te abscondere: &, cum primum mitigata furia laxaverint oves animum, percussis frondibus attigui nemoris, lanosum aurum reperies, quod passim stirpibus connexum obhærescit. Sic Arundo simplex & humana Psychem ægerrimam salutem suam docebat.

Nec auscultatu pœnitendo diligenter instruēta illa cessavit; sed observatis omnibus, furatrina facilis, flaventis auri mollitie congestum gremium Veneri reportat. Nec tamen apud dominam saltem secundi laboris periculum secundum testimonium meruit; sed contortis superciliis subridens amarum, sic inquit: Nec me præterit hujus quoque facti auctor adulterinus. Sed jam nunc ego sedulo periclitabor, an oppido forti animo singularique prudentia sis prædita. Videsne insistentem celcissimæ illi rupi montis ardui verticem, de quo fontis atri fuscæ defluunt undæ, proximæque conceptaculo vallis inclusæ Stygias irrigant paludes, & rauca Cocyti fluenta nutriunt? Indidem mihi de summi fontis penita scaturigine rorem rigentem hauritum ista confestimi deferto urnula. Sic ajens, crystallo dedolatum vasculum, insuper ei graviora comminata, tradidit.

At illa studiose gradum celerans, montis extremum petit cumulum, certe vel illic inventura vitæ pessimæ finem. Sed cum primum prædicti jugi conterminos locos appulit, videt rei vastæ letalem difficultatem. Namque saxum immani magnitudine procerum, & inaccessa salebitate lubricum, mediis e faucibus lapidis

fontes horridos evomebat: qui statim proni foraminis lacunis eduicti, perque proclive delapsi, & angusti canalis exerto contexti tramite, proximam convallem latenter incidebant. Dextera lævaque cotibus cavatis prosperrunt, & longa colla porrecti sævi dracones, in connivæ vigiliæ luminibus addictis, & in perpetuam lucem pupulis excubantibus. Jamque & ipsæ semet muniebant vocales aquæ. Nam &: discede, quid facis, &: vide, &: quid agis? cave, &: fuge, &: peribis, subinde clamant. Sic impossibilitate ipsa mutata in lapidem Psyche, quamvis præsenti corpore, sensibus tamen aberat; & inextricabilis periculi mole prorsus obruta, lacrymarum etiam extremo solatio carebat.

Nec Providentiae bonæ graves oculos innocentis animæ latuit ær umna. Nam supremi Jovis ales illa repente, propansis utrimque pinnis, affuit rapax aquila: memorque veteris obsequii, quo, ductu Cupidinis, Jovi pocillatorem Phrygium sustulerat, opportunam ferens open, deique numen in uxorius laboribus percolens, alti culminis Diales vias deserit, & ob os puellæ prævolans, incipit: At tu simplex alioquin, & expers rerum talium, sperasne te sanctissimi nec minus truculentí fontis vel unam stillam posse furari, vel omnino contingere? Diis etiam, ipsique Jovi formidabiles aquas istas Stygias vel fando comperisti: quodque vos dejeratis per numina deorum, deos per Stygiæ majestatem solere. Et protinus arreptam complexamque festinanter, libratisque pinnarum nutantium molibus, inter

genas sævientium dentium, & trisulca vibramina draconum remigium dextra lævaque porrigens, nolentes aquas, &, ut abiret innoxius, præmonentes, excipit: commentus ob jussum Veneris petere, eique se præministrare. Quare paullo facilior adeundi fuit copia. Sic acceptam cum gaudio plenam urnulam Psyche Veneri citata retulit.

Nec tamen nutum deæ sævientis vel tunc expiare potuit: nam sic eam, majora atque pejora flagitia comminans, appellat renidens exitiabile: Jam tu quidem videris maga quædam mihi & alte prorsus malefica, quæ talibus præceptis meis obtemperasti gnaviter. Sed adhuc istud, mea pupula, ministrare debebis. Sume istam pyxidem (& dedit protinus) & usque ad inferos & ipsius Orci ferales penates te dirige. Tunc conferens pyxidem Proserpinæ: Petit de te Venus, dicio, modicum de tua mittas ei formositate, vel ad unam saltem dieculam sufficiens. Nam quod habuit, dum filium curat ægrotum, consumsis atque contrivit omne. Sed haud immaturius redito: quia me necesse est indidem delimitam theatrum deorum frequentare.

Tunc Psyche vel maxime sensit ultimas fortunas suas, &, velamento rejeðo, ad promptum exitium sese compelli manifeste comperit. Quidni? quæ suis pedibus ulro ad Tartarum manesque demeare cogeretur. Nec contata diutius, pergit ad quampiam turrim præaltam, indidem sese datura præcipitem: sic enim rebatur ad inferos recte atque pulcerrime se posse de-

scendere. Sed turris prorupit in vocem subitam, & Quid te, inquit, præcipitio, misella, quæris extingue-re? quidque jam novissimo periculo laborique isti temere succumbis? Nam, si spiritus corpore tuo semel fuerit sejugatus, ibis quidem profecto ad imum Tartarum, sed inde nullo pacto redire poteris. Mihi ausculta. Lacedæmon Achajæ nobilis civitas non longe sita est. Hujus conterminam, deviis abditam locis, quære Tænarum. Inibi spiraculum Ditis, & per portas hiantes monstratur iter invium: cujus te limite transmeato simul commiseris, jam canale directo pergis ad ipsam Orci regiam. Sed non hactenus vacua debabis per illas tenebras incedere, sed offas polentæ mulso concretas ambabus gestare manibus, ac in ipso ore duas ferre stipes. Jamque confecta bona parte mortiferæ viæ, continuaberis claudum asinum lignorum gerulum, cum agasone simili: qui te rogabit, decidentes sarcina fusticulos aliquot porrigas ei. Sed tu nulla voce depromia, tacita præterito. Nec mora, cum ad flumen mortuum venies, cui præfectus Charon protinus expetens portorium sic ad ripam ulteriorem sutili cymba ducit commeantes.

Ergo & inter mortuos avaritia vivit? nec Charon ille, & Ditis pater, tantus deus, quidquam gratuito facit; & pauper moriens viaticum debet quærere, &, æs si forte præ manu non fuerit, nemo eum exspirare patietur? Huic squallido seni dabis navali nomine de stipibus, quas feres, alteram: sic tamen, ut ipse sua manu